

Generis *Iphthimi* characteres.

Auctore **E. Truqui.**

Iphthimus.

Caput elongatum; oculis transversis, lateralibus, angustis, medio constrictis; ante oculos dilatatum, antennisque sub dilatatione insertis.

Antennae undecim articulis, apice incrassatae: articulo 1^o crasso; secundo minuto; tertio omnium longissimo, apice leviter incrassato; 4^{to} 5^{to}que longitudine aequalibus: sequentibus crassioribus: ultimo praecedente longiore.

Labrum transversum, apice incrassatum, lateribus rotundatum, medio tenuiter emarginatum: margine antico, parachiliisque dense ciliatis.

Mandibulae crassae et validae, externe rotundatae: margine supero tuberculato: pagina superiore, secundum marginem externum leviter et late sulcata: margine interno apicem versus sinuato, medio fortiter et abrupte exciso: inferne late excavatae et bisulcatae, carina inter sulcos plus minusve valida: dente molari valido, interne plano, et transversim sulcato: membrana vesiculosa et pellucida excisuram internam omnino replente, et cum parte interna mandibulae per foramen communicante.

Maxillae malis binis, longitudine aequalibus: mala externa crassiore, mutica, supra et apice dense et longe setosa: mala interna intus dense ciliata, apice uncinata, unco bifido, nudo.

Palpi maxillares quadriarticulati: articulo primo brevi, basi pedunculato, apice dilatato: secundo longo, basi angustato, supra complanato: tertio brevissimo: ultimo praecedente longiore, omniumque crassissimo, apice truncato.

Mentum transversum, longitudinaliter impressum, apice leviter excisum, utrinque rotundatum: ligula cornea, apice bisinuata, margine antico, et paraglossis dense ciliatis.

Palpi labiales triarticulati, articulis brevibus, ultimo crassiore, obovato.

Prothorax transversus, subcordatus.

Scutellum minutum, rotundatum.

Elytra libera, alas breves obtegentia.

Pedes coxis anterioribus globosis, posticis transversis: femoribus tibiisque anticis incurvatis, ceteris subrectis: tibiis omnibus apice interne tomentosus: tarsis anterioribus articulis quatuor primis brevibus, et inter se aequalibus, ultimo praecedentibus simul sumptis subaequali, posticis articulo primo sequentibus binis sejunctim sumptis longiore, ultimo

praecedentibus tribus simul sumptis subaequali: tarsis omnibus subtus, articulis basalibus omnino, ultimoque bifariam, breviter setulosis.

Genus inter *Tenebrionites* *Mulsantii* locandum, et prope genera *Upim* et *Nyctobatem*.

Iphthimus italicus.

„Niger, subtilissime punctatus, subopacus: antennarum „articulis 9^{no}. et 10^{mo}. fortiter transversis, ultimo vix „latitudine propria longiore: pronoto lateribus crenato: „elytris striatopunctatis, striarum punctis disjunctis, „juseulis, interstitiis subtilissime punctulatis. Long. „0^m., 0,24. Lat. 0^m., 0,10.

Caput subtiliter punctatum, utrinque prope marginem internum oculorum longitudinaliter torosum: epistomate sutura sejuncto, antice leviter emarginato: antennis articulis 4^{to} et 5^{to} longitudine aequalibus, quinto leviter interne dilatato, 6^{to} et 7^{mo} subconicis; sequentibus sensim brevioribus, intus dilatatis, fortiterque transversis, ultimo subrotundato, praecedente longiore. Pronotum longitudine minus quam sesqui latius; basi utrinque sinuatum, medioque nonnumquam, ante scutellum, sinu levissimo; angulis posticis acutis; lateribus antice fortiter rotundatis, pone medium sinuatum angustatis, terque vel quater crenatis; angulis anticis obsoletis; transversim convexum, antice utrinque leviter depressum; lateribus sat dense, medioque parcius et subtiliter punctatum. Scutellum fortiter et parce punctatum. Elytra basi prothoracis maximam latitudinem aequantia, eodemque fere triplo longiora, pone medium leviter dilatata, convexa, subtilissime punctulata, seriebus octo, praeter marginalem et scutellarem, punctorum majorum, punctis distantibus, in spatio longitudinali levi sitis; margine externo apice leviter sinuato. Corpus subtus punctatum et rugulosum: abdomine nitido, segmentis ternis primis basi densius punctatis et longitudinaliter rugosis; iisdemque apice, ultimisque binis, parcius punctatis.

Habitat sub cortice arborum, in oris maritimis Etruriae.

Iphthimus croaticus.

„Niger, subtiliter punctatus, subopacus: antennarum „articulis 9^{no} et 10^{mo} fortiter transversis, ultimo vix „latitudine propria longiore: pronoto lateribus vix cre- „nato: elytris-striato-punctatis, striarum punctis disjunc- „tis, minutis: interstitiis subtilissime punctatis. Long. „0^m., 0,24. Lat. 0^m., 0,10.

Habitat in Hungaria et Croatia (Dom. Frivaldsky et Stentz). In Graecia (Dom. De Sauley, secundum Dm. Reiche in litteris, qui Iphthimum angustatum catalogi sui Coleopterorum Orientalium a. Dm. de Sauley relatorum, pag. 16, huc refert).

Iphthimo italico simillimus, at punctura capitis pronotique minus subtili, pronoto minus transverso posticeque minus coarctato, vixque crenato, et praesertim elytris extus magis rugulosis, striarumque punctis multo subtilioribus, non nisi oculo armato conspicuis, distinctus videtur.

Iphthimus Bellardii.

„Niger, subnitidus, punctatus: antennarum articulis 9^{no} et 10^{mo} vix transversis, ultimo elongato: pronoto lateribus crenato, crebre punctato: elytris striato-punctatis, striarum punctis confluentibus, interstitiis sat fortiter punctatis. Long. 0,^m, 0,26. Lat. 0,^m, 0,10.

Truqui, in Memorie dell' Acad. delle Scienze di Torino. Serie II. Tom. XVII. 1857. Ex Insula Cypro.

Iphthimus serratus.

Nyctobates serrata. Mannerheim, Beitrag zur Käfer-Fauna der Aleutischen Inseln Sitkha und Neu-Californiens, p. 112. n. 232.

E California (Mus. Reg. Taurin.)

„Niger, subtiliter punctatus, opacus: antennarum articulis nono et decimo fortiter transversis, ultimo vix latitudine propriâ longiore: pronoto lateribus crenato: humeris elytrorum rotundatis, his striatopunctatis, striarum punctis disjunctis, minutis: interstitiis confertim punctatis. Long. 0,^m, 0,23. Lat. 0,^m, 0,10.

Species a praecedentibus in primis statura, servata proportione, brevior, capite dense punctato, subruguloso, humeris elytrorum rotundatis, spatiis longitudinalibus laevibus majoribus, interstitiisque confertim punctatis distincta.

ZOBODAT - www.zobodat.at

Zoologisch-Botanische Datenbank/Zoological-Botanical Database

Digitale Literatur/Digital Literature

Zeitschrift/Journal: [Entomologische Zeitung Stettin](#)

Jahr/Year: 1857

Band/Volume: [18](#)

Autor(en)/Author(s): Truqui E.

Artikel/Article: [Generis Iphthimi characteres. 92-94](#)